

Biografia di Maximiliaan Thomas Rigard Hassell (Max)

Maximiliaan Thomas Rigard Hassell, a nace na Kralendijk Boneiro, dia 4 di februari 1945. Max tin mas diferente number di cariño. Tito Flores (dfm) un biaha el a yam'e mol! Awo otro hende a tende, anto nan a kere cu ela bisa small, paso Max ta un tiki chikito tambe. E number di small tambe a pega. Su mama yama Helenita Hassell Kuipers naci na Aruba y su tata ta Oswald Adolphus Hassell naci na Saba. Max tin dos ruman muhe y tres ruman homber. Max ta e prins heredero, e yiu homber mas grandi. Max ta ex-casa di Sra. Ingrid Van Der Kuip. Nan a casa na 1971. Nan tin un yiu homber y un yiu muhe. Su yiu homber yama Daxenos (Dax) Rigard Maximiliaan y su yiu muhe yama Thanee Ingeborg Hassell.



Segun Max e bida artistico a bira parti di su bida

Semper Max tabata keda den fondo (background). Despues cu Max a baha cu pensioen di Setar, musica a bira realmente parti di su bida. Max no sa con e por biba sin musica. El a bira un trabou. Bo preparacion y presentacion ta e cosnan mas importante. Y wak pa bo cumpli tambe! Esey Max ta haya hopi importante. Tabatin hopi momento agradabel, sigur. Dia cu nan a gana e festival na Corsou, tabata algo cu niun hende y ni nan mes a spera. Ainda Max ta corda con tur hende tabata asina contento cu te hasta nan a yora un tiki riba podium. Y tambe nan ta corda e presentacionnan na Chile. Nan ta den hotel, anto nan tin di bay e teatro pa ensayo. Nan ta manda auto cu polis dilanti y polis patras. Nan a cera caminda pa trafico, te ora nan caba di pasa. Kiermen esaki no tabata pa nan so, pero pa tur e artistanan. Esey bo ta yama un bon trato pa garantisar seguridad di artistanan. Manera Max a bisa, e ta canta den misa. Varios biaha bo ta haya cu un scol ta yama pa e bay toca durante un misa pa nan scol. Naturalmente Max ta bay. Ora bo ta riba e koor, bo ta wak e muchanan drenta, nan ta bira wak y ta saluda bo. Max ta gosa esey y e ta sinti hopi bon.

E bida artistico



Max kier a toca guitarra

Door cu Max su tata ta hende di Isla Ariba, mayoria di e hendenan ey, semper ta basta musical. Nan mester a toca un instrument, si nan kier of no kier. Max su ruman muhe tabata toca guitarra y despues a bay pa dwarsfluit. Su ruman Oswald ta toca acordeon. Billy, e ruman di mas chikito, tambe ta cantante, e tabata canta den Jeffreys cu e gruponan di rock promenan aya. Pasobra Max su tata tabata toca mandolin, e kier pa Max tambe toca e instrument aki. Max a toca mandolin y ainda e ta toc'e un tiki. Pero en realidad, Max kier a toca guitarra. Su ruman

cu a nace prome cu Max, por a scoce prome y el a bay pa guitarra. E tabata haya les di amigo di su tata, anto tra'i cortina Max ta wak kico nan ta haci. Asina nan bay, Max ta coy e guitarra y cuminsa train. Di e forma ey Max a cuminsa. Antes tabatin masha hopi trio aki na Aruba. Francamente bisa, e ta gusta e musica di guitarra. Max tin un primo cu yama Marcelo Kock, kende tambe ta un cantante y guitarista, masha conoci e tempo aya. Max a bay cerca dje y a pidie un guitarra kibra cu e tabatin bou di cama. El a duna Max e, pero e no tabatin ni patras ni dilanti. E tabata na werki.

Max a busca un pida plywood fini, su mes a traha riba dje, peg'e, dal e un vernis, busca cuerde pone riba dje. Pero e prome guitarra cu Max a cumpra, ainda e ta corda, tabata cerca Sr. Miranda. E tabatin un un tienda cu instrumentonan musical (Foto Hanna), anto Max a cumpra un Yamaha Classical. E tempo ey, Voz Di Aruba tabata unda e warda di polis di Playa ta awor. Tur diadomingo atardi tabatin un programa di trio, anto Max tabata bay, para tra'i glas, wak kico nan ta haci. Riba caya tambe banda di su cas tabatin Cale Tromp cu su ruman homber.

Ainda Cale Tromp ta na bida. Nan tabata toca, anto Max ta bay wak kico nan ta haci y nan tabata siña Max tiki tiki. E tabata toca den grupo, su prome grupo tabata un trio cu yama Dilitantes, di defunto Frank Jeand'or y Robert Maldonado. Nan tres a cuminsa toca, pero despues patras di su cas tabata biba Siegfried Odor, mihor conoci como Canawa. El a bin bisa Max cu e ta maha cu e hendenan aki, miho Max toca cu Trio Huasteca! Asina Max a cuminsa cu Trio Huasteca. Despues di Trio Huasteca, el a bay canta den misa, y forma parti di diferente koor.

Max su tata tabata toca mandolin y e tabata kier pa Max toca mandolin tambe, pero en realidad Max kier a toca guitarra

Desaroyo musical



Max durante presentacion

Nan a yega di toca aki na un show caminda a participa "Trio Los Panchos" tambe. Nan a duna actuacion prome y despues nan a bin nan tras. Nan a comparti e camerino. Net nan a caba di toca, nan a drenta eyden, un di cu e otro pero kico nos ta bay toca awor, nan a toca tur nos canticanan caba. Nan tur a hari pareu! Nan no tabata sa, nan a hacie pasobra e organisadornan a pidi trio y nan a toca canticanan di trio! For di principio cu

Max a cuminsa toca, semper e ta gusta bisti formal, E tabata completamente di acuerdo cu e ocasion pa cual nan a pidi pa duna presentacion. Kiermen, si Max toca por ehempel pa un fiesta di bruid, Max ta bay cu un bachi cu dashi. Bon pega! Si Max toca na beach, e lo bay cu un trahe mas casual. Pero Max no ta gusta pa ta "casual bisti" ora Max mester toca na un ocasion importante. Esaki ta contra su principio!

E parti internacional

Cu Trio Huasteca, nan a yega di bay Hawaii, New York, Alemania, pa promove Aruba cu sosten di Toeristen Bureau. Nan a toca na varios festival, dos di OTI, un na Mexico y otro na Chile, un festival di cancion na Puerto Rico, anto localmente nan a participa na varios festival tambe.



Trio Huasteca durante Festival di OTI

Grabacionnan realisa

Max tin un par di grabacion realisa. Su yiu muhe a studia “sound engineering”, anto el a siña Max un tiki di e programa Pro Tools. Su yiu a instala Pro Tools den Max su computer, despues su mes a cuminsa graba. Max a traha dos cd di su mes, pero prome cu esey Erin Croes cu Max a yega di forma un duo. Anto e tempo ey, nan a graba riba disco vinyl. Nan a traha un “cuarenticinco”. Ta asina nan ta yam’e disco chikito, no? Trio Huasteca tambe a yega di graba un LP (disco di largo duracion). E tempo ey, nan tabata toca na Concord Hotel. Anto nan a manda e Trio Bogota Colombia, pa haci e grabacion ey den studio. Hopi interesante. Tambe aki na Aruba, nan a yega di graba na Radio Kelkboom. Ora bo ta bay graba, bo ta purba di graba



Bautismo di disco “Di bo mita” Mi guitarra

na Aruba, nan a yega di graba na Radio Kelkboom. Ora bo ta bay graba, bo ta purba di no graba den tempo di fin di aña, pasobra e ora ta tur hende ta den e gara di gaita y musica di Pasco. Tampoco bo no mester saca disco den tempo di Carnaval. Ta dura hopi luna pa prepara, prome cu bo haci grabacion den studio. Tempo di Concord Hotel, ta nan tabata dicidi tur cos. Nan a saca hopi potret pa nan por scoge cuanto nan ta pone. Pero pa e dos cd-nan chikito cu Max a traha,



Disco 45, Duo Erin y Max



2 CDs di Max, Boleros y Pa mi Aruba

ta su mes a saca potret y scoge cua e ta pone riba e caratula. E gastonan di Max su cd ta e mes a cubrie. Ta bo mes ta purba promove bo produccion musical durante e ora di noticia na radio. Bo ta yama tur hende di prensa pa un rueda di prensa. Bo ta purba bishita tur e radio-emisoranan y bo ta spera cu nan ta toca bo cancionnan, sino bo ta keda mes leu.

Sugerencia pa futuro generacion



Max y su guitarra tocando live

Max ta bisa pa nos ban “back to the basics”. Ban toca di berdad! No uza grabacionnan graba prome, anto bo ta gewoon canta. Por ehempel, Max tin un amigo cu ta toca guitarra tambe y ta canta. Un biaha e ta tocando un caminda anto Max ta pasa, e ta salud’e, anto Max ta haya esaki straño, pasobra e ta sigui canta anto papia cu Max toch. Luga ta gewoon playback e ta haci, e mes no ta tocando! E ta cu guitarra, stop di toca, papia cu Max anto e musica ta sigui zona! Di berdad Max ta bisa laga nos yiunan, y tur esnan cu ta sigui nan, pa nan bay “back to the roots” y cuminsa practica musica di berdad. Ora bo ta toca un instrument, bo por yena, ban bisa bo por toca piano, guitarra, yen’e cu poco musica den fondo (background music) pa hacie mas bunita, pero abo no mester depende di esey. Ta hopi importante pa ban siña toca manera mester ta! Y canta tambe naturalmente.